

25 FEB 1997

AS-Perhatian

ASEAN DAN ASIA TENGGARA AKAN MENERIMA PERHATIAN SEWAJARNYA

KUALA LUMPUR, 25 Feb (Bernama) -- Amerika Syarikat (AS) di bawah pentadbiran Presiden Bill Clinton bagi penggal kedua dijangka memberi perhatian yang sewajarnya kepada Asean dan negara-negara lain di Asia Tenggara walaupun rantau itu tidak dianggap agenda utama dasar luar AS.

Seorang pakar dasar luar AS, Frederick Z. Brown dari Universiti John Hopkins di Washington berkata, walaupun dasar luar yang baru diumumkan oleh Setiausaha Negara AS Madeleine Albright tidak menganggap Asia Tenggara sebagai agenda utamanya, rantau itu tetap penting kepada AS seperti negara-negara Asia Barat, China dan Jepun.

Asean dan negara-negara di rantau itu dapat menangani perkara-perkara berkaitan dengan keselamatan dan ekonomi mengikut caranya sendiri, kata beliau semasa Dialog Interaktif Worldnet Mengenai Pentadbiran Penggal Kedua Clinton dan Asia Tenggara di Kedutaan AS di sini.

Anggota panel dari Kuala Lumpur terdiri daripada Prof Dr Stephen Leong dari Institut Kajian Strategik dan Antarabangsa (ISIS), Prof Dr K.S Nathan dari Universiti Malaya. Anggota panel yang lain ialah dari Manila dan Jakarta.

Brown berkata, kegagalan Albright untuk menyatakan Asia Tenggara dalam kenyataannya di hadapan Jawatankuasa Hubungan Luar Senat Januari lepas tidak bermakna rantau itu tidak penting bagi Amerika berbanding rantau lain.

Brown yang merupakan pengasas Program Kajian Asia Tenggara di Sekolah Kajian Antarabangsa universiti itu, menjangkakan Albright akan membuktikan kepentingan Asia Tenggara semasa lawatannya ke Kuala Lumpur Julai depan.

Mengenai Asean-10 dan isu keanggotaan Myanmar dalam Asean, beliau berkata AS tidak akan menggunakan sebarang kuasa veto terhadap perkara itu dan menghormati cara Asean dalam mencapai kata sepakat.

Ahli panel dari Jakarta, bertanya kepada Brown sama ada pengganti pemimpin-pemimpin Asean seperti Presiden Suharto dan Datuk Seri Dr Mahathir Mohamad mampu meneruskan kestabilan masa kini di rantau itu, Brown berkata pemimpin masa depan berupaya dalam mengekalkan perkara itu. -- BERNAMA

RAZ PR